



Apequteqaat aallavigalugu oqallisissaq, qanoq iliorluta aatsitassat nunatsinnut nunaqavissunullu iluaqutaanerulersinnaavagut?

(Inatsisartunut ilaasortaqaq Mariane Paviasen, Inuit Ataqtigiit)

Inatsisartunut ilaasortamut Mariane Paviasen, Inuit Ataqtigiit qujanaq siunnersuummut.

Demokraatini isumaqarpugut aatsitassarsiorneq nunatta siunissami aningaasaqarneranut pingaaruteqartutut inissisimasooq. Aammattaaq isumaqarpugut, nunaqavissut aatsitassarsiornermi peqataanissaat periarfissaasariaqartoq. Isumaqarpugullu, uagut nunatut aatsitassarsiornermit amerlanerpaanik aningaasanik isaatitsisariaqartugut.

Aallaqqaasiutitut oqaatigilaarlara, aatsitassanik piiasoqalersinnagu, isertitsissutaanaviangimmata. Annerunanilu minnerunnigilaq. Aatsitassanik piianeq akisuvoq, taamaattumillu taakkuninnga piianeq avataanit aningaasaliinernik annertoorejussuarnik pisariaqartitsilluni. Tassani pingaartuuvoq oqimaatigiissaarineq uagut maani nunatsinni aningaasanik isaatitsinissarput aningaasaliisup qiimaatinnagit. Tassani eqqaamassavarput, kikkulluunniit aningaasaliinaviangimmata pitsaasumik isertitaqassanngikkunik.

Tassunga ersisaarut assersuutigineqarsinnaavoq 2013-mi, qinersineq ajugaaffigineqarmat royalties eqqussiniarneq neqitaralugu. Taassuma kinguneraa, ineriartornerup unittoornera taamatullu aningaasanik isaatitsinngitsoorluta. 2021-mi qinersineq ajugaaffigineqarpoq uuliasiornerup matunera Kuannersuarnilu piiaffiup matuneqarnera. Demokraatit qinersisartut oqariartuutaat ataqqivaat, kingunerivaali, aningaasarsiorfissaraluatsinnik mattussinerput. Tamanna tunngavigalugu eqqumiiginalaarpoq, uani IA-mi ilaasortamit siunnersuut suliarigatsigu, aatsitassarsiornermi annertunerusunik isertitaqarnissarput uffa ilisimaaralugu, IA-p, aatsitassarsiornermi isertitsiffiginerpaasassaraluatta marluk matuniarnerat qinersinermi siuliani ajugaassutigigaat.

Demokraatilli oqareernertut amerlanerussuteqartut isumaat ataqqivaat. Sulilu periarfissaqarpoq aatsitassanik piianerme isertitaqarsinnaaneq – annikinnerujussuuginnassarli, aammalu ilimanarani ima annertutigissasoq, aatsitassarsiorfissuurtut immitsinnut taanissatsinnut.

Isumaqarpugut, maannakkut inatsisaasoq sukangavallaartoq. Ilaatigut inuit iluarisimaarinnillutik oqartut tusaasarpakka, aatsitassanut inatsiseqartugut nunarsuarmi sukanganerpaamik. Demokraatinut pingaartuuvoq, avatangiisinut inatsisip annertuumik sukanganissaa. Pingaartuuvoq avatangiisitta mianernartup illersornissaa. Kisiannili imaappasippoq aatsitassanut inatsit tamatigut sukangaavallaarujussuuartoq sullissinerlu arriippallaartoq. Taakku aatsitassarsiornermissat aallartinniarnernut ajornartorsiortitsipput kingunerluutigisinnallugulu, suliniartut tunniutiinnartarnerat.



Tamanna tunngavigalugu Demokraatit isumaqatigaat, inatsit misissortariaqaripput eqaannerulersillugu sunniuteqarluarninngorlugulu. Inatsilli Kalaallit Nunaannut iluaqutaajuartussaassaaq. Eqqaamassavarpulli aatsitassap nunamiiginnartillugit, naleqanngimmata kikkunnulluunniillu iluaqutaanatik.

Tassa Demokraatit oqallinnermut isummersuutaat.